



唐張同業詩集目錄

卷之一

五言古詩

野居

雜怨

七言古詩

寄遠曲

征婦怨

野老歌

送遠曲

一作山農歌

西州

三原李氏園宴集



行路難

白紵歌

寄衣曲

築城詞



猛虎行

別離曲

牧童詞

沙堤行呈裴相公

求仙行

古釵嘆

各東西

節婦吟

讌客詞

永嘉行

採蓮曲

傷歌行

吳官怨

北邙行

關山月

少年行

白頭吟

將軍行

賈客樂

羈旅行

車遥遥

妾薄命

朱鷺

咏別離

楚宮行

江南行

烏啼引

促促詞

宛轉行

卷之二

五言律詩

薊北旅思

江南春

西樓望月

別鶴

江陵孝女

山中古詞

漁陽匠

聽夜泉

送南遷客

薊北春懷

思遠人

贈同谿客

望行人

送官人入道

送越客

贈辟穀者

思江南舊遊

夜聽漁家

送遠使

不食姑

古苑杏花

送流人

宿臨江驛

送蠻客

襄國別友

送遠客

上國贈日南行

征西將

寄友人

送防秋將

律僧

山中秋夜

送南客

宿江店

嶺外逢故人

出塞

寄紫閣隱者

夜宿黑龍谿

古樹

送徐先生歸蜀

隱者

雪谿西亭晚望

送友人歸山

哭山中友人

答僧挂杖

靈都觀李道士

送常評事歸華陰

送闍僧

送海客歸舊島

登咸陽北寺樓

送新羅使

送廣德寺寄從舊

宿邯鄲舒寄馬磁州

舟行寄李湖州

送閑師歸江南

遊襄陽山寺

登城寄王建

送從弟戴玄往蘇州

送朱慶餘及第歸越

過賈島野居

酬韓庶子

贈姚合少府

送僧遊五臺兼謁李司空

送鄭秀才歸寧

送李評事遊越

閑居

寄昭王中丞

酬孫洛陽

送人任濟陰

晚春過崔駙馬東園

晚秋閑居

和裴司業習靜寄所知

酬韓祭酒雨中見寄

和裴僕射移官言志

酬白二十二舍人早春曲江見招

酬裴僕射朝回寄韓吏部

春日李舍人宅見兩省諸公唱和因書情即事

和李僕射秋日病中作

早春病中

送嚴大夫之桂州

詠懷

留別江陵王少府

使至藍谿驛寄太常王丞

贈海東僧

寄漢陽故人

送安西將

題李山人幽居

早春閑遊

贈太常王建藤杖筓鞋

和周贇善聞子規

送李騎曹靈州歸觀

寒食夜寄姚侍

題清徹上人院

和裴司空即事通簡舊僚

使至留別襄陽李司空

和吏部令狐尚書喜裴司空見招看雪

和裴司空以詩請刑部白侍郎雙鶴

同錦州胡郎中清明日對雨西亭宴

莊陵挽詞

三首

和左司元郎中秋居

經王處士原居

下食仙姑山房

江頭

寄孫冲主簿公

贈任懶

舊官人

春日留別

沒蕃故人

卷之三

五言排律

和李僕射雨中寄盧嚴二給事

酬李僕射晚春見寄

憶盧常侍

寄華山鄭隱

和令狐尚書平泉東莊近居李僕射有寄

送鄭尚書出鎮南海

徐州誠反舌無聲

省試行不由徑

新城甲仗樓

贈啟山人

夏日可畏

罔象得玄珠

和李僕射西園

卷之四

七言律詩

送裴相公赴鎮太原

寄元員外

贈梅處士

贈王秘書

謝裴司空寄馬

酬秘書王丞見寄

送李餘及第後歸蜀

早朝寄白舍人嚴郎中

書懷寄元郎中

贈僧道

書懷寄王秘書

題帝郎中新亭

送揚州判官

喜王起侍郎放牒

贈王司馬

史百懷

贈令狐博士

送從弟刪東歸

贈王秘書

哭丘長史

送枝江劉明府

送從弟徹東歸

哭胡十八

贈賈島

逢王建有贈

移居靜安答元八郎中

送楊少尹赴鳳翔

送韓侍御歸山

送楊少尹赴滿城

新除水曹郎答白舍人

哭元九少府

送侯判官赴廣州從弟

答白杭州郡樓登望畫圖見寄

贈趙將軍

送和蕃公主

寒食內宴 二首

朝日勅賜櫻桃

太白老人

和裴司空酬滿城楊尹

寄和州劉使君

贈商州王使君

寄令狐賓客

寄梅處士

送施肩吾東歸

崑崙兒

贈李杭州

送鄭尚書赴廣州

拜豐陵

贈孔尚書

酬杭州白使君兼寄浙東元大夫

寄蘇州白二十二使君

賀秘書王丞南郊攝將軍

送令狐尚書赴東都留守

送白賓客分司東都 贈閻少保

贈別王侍御赴任陝州司馬

田司空入朝

送浙西周判官

送胡鍊師歸王屋

送郡州林使君

寄王六侍御

送稽亭山寺僧

送汀洲元使君

寄孫洛陽格

胡山歸王屋因有贈

寄處州韓使君

送從弟濛赴饒州

羅道士

寄陸渾趙明府

贈王侍御

同蔣帝二少監贈李郎中

送金少卿副使歸

新羅

送李司空赴鎮襄陽

送李僕射赴鎮鳳翔

寄白二十二舍人

卷之五

五言絕句

和韋開州居山十二首

宿雲亭

梅溪

茶嶺

流杯渠

盤石磴

桃塢

竹巖

琵琶臺

胡蘆沼

隱月岫

繡衣石榻

上士泉竝

送遠客

寄西峰僧

禪師

惜花

題暉師影堂

涇州塞

野田

岸花

卷之六

七言絕句

送蜀客

送元紹

宿山祠

美人官基

蠻州

送元宗簡

寄徐晦

寄白學士

喜王六同宿

題玉像堂

與賈島閑遊

哭丘長史

哭孟寂

患眼

答劉兢

贈華嚴院僧

逢故人

送蕭遠弟

送年少府任安縣

贈任道人

招周居士

送許處士

送律師婺州

題楊秘書新居

送暉師

送僧往金州

尋徐道士

答開州韋使君寄車前子

憶故州

送客遊蜀

送陸暢

感春

贈李司議

別客

登樓寄胡家兄弟

答劉明府

酬藤杖

法雄寺東樓

寄故人

鄰婦哭征夫

和崔駙馬聞蟬

和裴僕射看櫻桃

和長安郭明府與友人縣中會飲

唐昌觀看花

九華觀看花

贈姚合

同常員外開元觀道尋時

同韓侍御南谿夜賞

使行望悟真寺

重陽日峽道

贈主客劉郎中

同嚴給事聞唐昌觀玉蕊近有仙遇作二首

秋思

憶遠

玉仙館

寄府吏

張蕭遠雪夜同宿

涼州詞三首

宮詞

華清宮

崔駙馬養鶴

閑遊

劉兵曹贈酒

送梧州王使君

春日早朝

寄朱闕二山人

寄李渤

尋仙

同白侍郎杏園贈劉郎中

答鄱陽客藥名詩

寄宋景

寄王奉御

題渭北寺上人

閑遊

倡女詞

答元八遺紗帽

題僧院

送元八

吳楚詞

題方睦上人月臺觀

華山廟

病中酬元宗簡

寺宿齋

贈施肩吾

贈王建

逢賈島

楚妃怨

離官怨

成都曲

寒塘曲

春別曲

臺城

春詞

浪淘沙詞

傷愚溪 二首

聽舊宮人穆氏唱歌

楊柳枝詞 二首

宿都庭有懷

無題

堤上行 二首

竹枝詞 五首

楊柳送客

送客還幽州

揚州送客

隋宮燕

山禽

秋山

玉真觀

蠻中

贈道士

望平驛作

宿天竺寺寄盧隱寺僧

唐張司業詩集目錄

張司業集序

翰林學士中書舍人

張洎撰

司業諱籍字文昌和州烏江人也貞元十五年丞相
渤海公下及第歷官太祝祕書郎國子博士水部員
外郎國子司業公爲古風最善自李杜之後風雅道
喪繼其美者唯公一人故白太傅讀公集曰張公何
爲者業文三十春尤工樂府詞舉代少其倫又姚秘
監嘗讀公詩云妙絕江南曲淒涼怨女詞古風無手
敵新語是人知其爲當時文士推服也如此元和
公及元丞相白樂天孟東野訶調天下宗匠謂之元

和體又長於今體律詩貞元君前作者間出大抵互相祖尚拘於常態迨公一變而章句之妙冠於流品矣自皇朝多故荐經離亂公之遺集十不存一予自丙午歲迨至乙丑歲相次緝綴僅得四百餘篇藏諸篋笥餘則更俟博訪以廣其遺闕云爾

唐張司業詩集卷一

國子司業張籍

文昌

五言古詩

野居

貧賤易爲適荒郊亦安居端坐無餘思彌樂古人書
秋田多良苗野水多遊魚我無耒與網安得充廩厨
寒天白日短簷下煖我軀四肢漸寬柔中腸鬱不舒
多病減志氣爲容足憂虞况復苦時節覽景獨踟躕

羗胡據西州近甸無邊城山東收稅租養我防塞兵
胡騎來無時居人常震驚嗟我五陵間農者罷耘耕
邊頭多煞傷士卒難全形郡縣發丁役丈夫各征行
生男不能養懼身有姓名良馬不念秣烈士不苟營
所願除國難再逢天下平

雜怨

切切重切切秋風桂枝折人當少年嫁我當少年別
念君非征行年年長遠途妾身甘獨歿高堂有舅姑
山川豈遙遠行人自不返

三原李氏園宴集

暮春天早熱邑居苦囂煩言從君子樂樂彼李氏園
園中有草堂池引涇水泉開戶西北望遠見嵯峨山
借問主人翁北州佐戎軒僕夫守舊宅爲客侍華筵
高懷有餘興行樹芳且鮮傾我所持觴盡日共留連
踈拙不偶俗常喜形體閑况來幽棲地能不重嘆言
七言古詩

寄遠曲

美人來去春江暖江頭無人湘水滿浣沙石上水禽
栖江南路長春日短蘭舟桂楫常渡江無因重寄雙
瓊璫

行路難

湘東行人長嘆息十年離家歸未得弊裘羸馬苦難
行僮僕飢寒少筋力君不見牀頭黃金盡壯士無顏
色龍蟠泥中未有雲不能生彼升天翼

征婦怨

九月匈奴殺邊將漢軍全沒遼水上萬里無人收白
骨家家城下招魂葬婦人依倚子與夫同居貧賤心
亦舒夫死戰場子在腹妾身雖存如晝燭

白紵歌

皎皎白紵白且鮮將作春衣稱少年裁縫長短不能

定自持刀尺向姑前復恐蘭膏汗織指常遣傍人收
墮珥衣裳着時寒食下還把白鞭鞭白馬

野老歌

一作山農詞

老翁家貧在山住耕種山田三四畝苗踈稅多不得
食輸入官倉化爲土歲暮鋤犁倚空室呼兒登山收
橡實西江賈客珠百斛船中養天長食肉

寄衣曲

織素縫衣獨苦辛遠因回使寄征人官家亦自寄衣
去貴從妾手着君身高堂姑老無侍子不得自到邊
城裏慙慙爲看初着時征夫身上宜不宜

送遠曲

戲馬臺南山簇簇山邊飲酒歌別曲行人醉後起登
車席上回尊勸僮僕青天漫漫覆長路遠遊無家安
得住願君到處自題名他日知君從此去

築城詞

築城處千人萬人齊把杵重重土堅試行錐軍吏執
鞭催作遲來時一年深積裏盡着短衣渴無水力盡
不得拋杵聲杵聲未盡人皆死家家養男當門戶今
日作君城下土

猛虎行

南山北山樹冥冥猛虎白日統林行向晚一身當道
食山中麋鹿盡無聲年年養子在空谷雌雄上山不
相逐谷中近窟有山林長向村家取黃犢五陵年少
不敢射空來林下看行迹

別離曲

行人結束出門去幾時更踏門前路憶昔君初納采
時不言身屬遼陽戍早知今日當別離成君家計良
爲誰男兒生身自有役那得誤我少年時不如逐君
征戰死誰能獨老空閨裏

牧童詞

遠牧牛遠村四面禾黍稠
陂中飢鳥啄牛背令我不
得戲壠頭入陂草多牛散行
白犢時向蘆中鳴隔堤
吹葉應同伴還敲長鞭三四聲
牛羊食草莫相觸官
家截爾頭上角

沙堤行呈裴相公

長安大道沙爲堤早風無塵晚無泥
宮中玉漏下三刻朱衣導騎丞相來
路傍高樓息歌吹千車不行行者避
街官問吏相傳呼當前十里惟空衢
白麻詔下移相印新堤未成舊堤盡

求仙行

漢皇欲作飛仙子年年採藥東海裏
蓬萊無路海無邊方士舟中相枕死
招搖在天囚白日甘泉玉樹無仙實
九皇真人終不下空向離宮祠太乙
丹田有氣凝素華君能保之昇絳霞

古釵嘆

古釵墮井無顏色百尺泥中今復得
鳳凰宛宛轉有古儀欲爲首飾不稱時
女伴傳者不知主羅袖拂拭生光輝
蘭膏已盡股半折雕文刻樣無年月
雖離井底入匣中不用還與墜時同

各東西

遊人別一東復一西出門相背兩不返惟信車輪與
馬蹄道路悠悠不知處山高海闊誰辛苦遠遊不定
難寄書日日空尋別時語浮雲上天雨墮地暫時會
合終離異我今與子非一身安得死生不相棄

節婦吟

君知妾有夫贈妾雙明珠感君纏綿意繫在紅羅襦
妾家高樓連苑起良人執戟明光裏知君用心如日
月事夫誓擬同生死還君明珠雙淚垂何不相逢未
嫁時

讌客詞

上客不用顧金羈主人有酒君莫違請君看取園中
花地上漸多枝上稀山頭樹影不見石溪水無風應
更碧人人齊醉起舞時誰覺翻衣與倒幘明朝花盡
人已去此地獨來空繞樹

永嘉行

黃頭鮮卑入洛陽胡兒持戟升明堂晉家天子作降
虜公卿奔走如牛羊紫陌旌旛暗相觸家家雞犬驚
上屋婦令出門隨亂兵夫死眼前不敢哭九州諸侯
自曠土無人領兵來顧主北人避胡皆在南南人至
今能晉語

今指採蓮曲

秋江岸邊蓮子多採蓮女兒凭船歌青房圓實齊戢
戢爭前競折漾微波試索綠莖不尋藕斷處絲多刺
傷手白練束腰袖半卷不插玉釵粧梳淺船中未滿
度前洲借問阿誰家住遠歸時共待暮潮上自弄芙
蓉還蕩槳

傷歌行

黃門詔下促收捕京兆尹繫御史府出門無復部曲
隨親戚相逢不容語辭成謫慰南海州受命不得須
吏留身著青衫騎惡馬中門之外無送者郵夫防吏

急喧譁往往驚墮馬蹄下長安里中荒大宅東門已
除十二戟高堂舞榭鎖管絃美人遙望西南天

吳宮怨

吳宮四面秋江水江清露白芙蓉死吳王醉後欲更
衣座上美人嬌不起宮中千門復萬戶君恩反復誰
能數君心與妾既不同徒向君前作歌舞茱萸滿宮
紅寶垂秋風嫋嫋生繁枝姑蘇臺上夕燕罷它人侍
寢還獨歸白日在天光在地君今那得長相棄

北邙行

洛陽北門北邙道喪車麟麟入秋草車前齊唱薤露

歌高墳新起日峨峨朝朝暮暮人送葬洛陽城中人
更多千金立碑高百尺終作誰家柱下石山頭松栢
半無主地下白骨多於土寒食家家送紙錢烏鳶作
窠噉上樹人居朝市未解愁請君暫向北邙遊

關山月

秋月朗朗關山上山中行人馬蹄響關山秋來雨雪
多行人見月唱邊歌海邊漠漠天氣白胡兒夜度黃
龍磧軍中採騎暮出城伏兵暗處低旌戟漢水連天
霜草平野駝尋水磧中鳴隴頭風急鴈不下沙場苦
戰多流星可憐萬國關山道年年戰骨多秋草

少年行

少年從獵出長楊禁中新拜羽林郎獨到輦前射雙
虎君王手賜黃金璫日日鬪雞都市裏贏得寶刀重
刻字百里報讐夜出城平明還在娼樓醉遙聞虜到
平陵下不待詔書行上馬斬得名王獻桂宮封侯起
第一日中不爲六郡良家子百戰始取邊城功

白頭吟

請君膝上琴彈我白頭吟憶昔君前嬌笑語兩情宛
轉如縈素宮中爲我起高樓更開花池種芳樹春天
百草秋始衰棄我不待白頭時羅襦玉珥色未暗今

朝已道不相宜揚州青銅作明鏡暗中持照不見影
人心回互自無窮眼前好惡那能定君恩已去若再
返萑蒲花開月長滿

將軍行

彈箏峽東有胡塵天子擇日拜將軍蓬萊殿前賜六
纛還領禁兵爲部曲當朝受詔不辭家夜向咸陽原
上宿戰車彭彭旌旗動三十六軍齊上隴隴頭戰勝
夜亦行分兵處處收舊城胡兒殺盡陰磧暮擾擾唯
有牛羊聲邊人親戚曾戰沒今逐官軍收舊骨磧西
行見萬里空幕府獨奏將軍功

賈客樂

金陵向西賈客多船中生長樂風波欲發移船近江
口船頭祭神各澆酒停杯共說遠行期入蜀經蠻誰
別離金多衆中爲上客夜夜筭緡眠獨遲秋江初月
猩猩語孤帆夜發瀟湘渚水工持檝防暗灘直過山
邊及前侶年年逐利西復東姓名不在縣籍中農夫
稅多長辛苦棄業長爲販寶翁

羈旅行

遠客出門行路難停車斂策在門端荒城無人霜滿
路野火燒橋不得度寒蟲入窟鳥歸巢僮僕問我誰

家去行尋田頭暗未息雙轂長轅礙荆棘緣岡入澗
投田家主人舂米爲夜食晨雞喔喔茆屋傍行人起
掃車上霜舊山已別行已遠身計未成難復返長安
陌上相識稀遙望天門白日晚誰能聽我辛苦行爲
向軍前歌一聲

車遥遥

征人遥遥出古城雙輪齊動駟馬鳴山川無處不歸
路念君長作萬里行野田人稀秋草綠日暮放馬車
中宿驚麕游兔在我傍獨唱鄉歌對僮僕君家大宅
鳳城隅年年道上隨行車願爲玉鑿繫華軼終日有

聲在君側門前舊宅久已拋無由復得君消息

妾薄命

薄命婦良家子無事從軍去萬里漢家天子平四夷
護羗都尉裹屍歸念君此行爲死別對君裁縫泉下
衣與君一日爲夫婦千年萬歲亦相守君愛龍城征
戰功妾願青樓歌樂同人生各各有所欲詎得將心
入君腹

朱鷺

翩翩兮朱鷺來汎春塘栖綠樹羽毛如翦色如染遠
飛欲下雙翅斂避人引子入深澗動處水紋開灩灩

誰知豪家網爾軀不如飲啄江海隅

咏別離

蓮葉團團杏花折長江鯉魚鱗鱗赤念君少年棄親戚千里萬里獨為客誰言遠別心不易天星墜地能為石幾時斷得城南陌勿使居人有行役

楚宮行

章華宮中九月時桂花未落紅橘垂江頭騎火照輦道君王夜從雲夢歸霓旌鳳蓋到雙闕臺上重重歌吹發千門萬戶開相當燭籠左右列成行下輦更衣入洞房洞房侍女盡焚香玉階羅幃微有霜齊言此

夕樂未央玉酒湛湛盈華觴絲竹次第鳴中堂巴姬起舞舞向君王迴身垂手結明璫願君千年萬年壽朝出射麋夜飲酒

江南行

江南人家多橘樹吳姬舟上織白苧土地卑濕饒蟲蛇連木為牌入江住江村亥日長為市落帆度橋來浦裏清莎覆城竹為屋無井家家飲潮水長干午日沽春酒高高酒旗懸江口娼樓兩岸懸水柵夜唱竹枝留北客江南風土歡樂多悠悠處處盡經過

烏啼引

秦烏啼啞啞夜啼長安吏人家吏人得罪囚在獄傾
家賣產將自贖少婦起聽夜啼烏知是官家有赦書
下床心喜不重寐未明上堂賀舅姑少婦語啼烏汝
啼慎勿去借汝庭樹作高巢年年不令傷爾雛

促促詞

促促復促促家貧夫婦懽不足今年爲人送租船去
年捕魚在江邊家中孤老子復小自執吳納輸稅錢
家家桑麻滿地黑念君一身空努力願教牛蹄團團
羊角直君身常在應不得

宛轉行

華屋重翠幄綺席雕象床遠漏微更踈薄衾中夜涼
爐氣暗徘徊寒燈背斜光妍姿結宵態寢辟幽夢長
宛轉復宛轉憶君更未央

唐張司業詩集卷三

翰林學士中書舍人張洎編輯

五言律詩

薊北旅思

日日望鄉國空謠白苧詞長因送人處憶得別家時
失意還獨語多愁祗自知客亭門外柳折盡向南枝

江南春

江南楊柳春日暖地無塵渡口過新雨夜來生白蘋
晴沙鳴乳鴈芳樹醉遊人向晚青山下誰家祭水神

西樓望月

城西樓上月復是雪晴時寒夜共來望思鄉獨下遲
幽光落水塹淨色在霜枝明日千里去此中還別離

別鶴

雙鶴出雲谿分飛各自迷空巢在松頂折羽落紅泥
尋水終不飲逢林亦未栖別離應易老萬里雨淒淒

江陵孝女

孝女獨垂髮少年唯一身無家空托墓主祭不從人
相吊有行客起廬無舊隣江頭聞哭處寂寂楚花春

山中古祠

春草空祠墓荒林唯鳥飛記年碑石在經亂祭人稀

朱帳

塵蓋盡衣近來潭水黑時見宿龍歸

漁陽將

塞深沙草白都護領燕兵放火燒奚帳分旗築漢城
下營看嶺勢尋雪覺人行更向桑乾北擒生問磧名

聽夜泉

細泉深處落夜久漸聞聲獨起出門聽欲尋當澗行
還疑隔林遠復畏有風生月下長來此無人亦到明

送南遷客

去去遠遷客瘴中衰病身青山無限路白首不歸人
海國戰騎象蠻州市用銀一家分幾處誰見日南春

薊北春懷

渺渺水雲外別來音信稀因逢過江使却寄在家衣
問路更愁遠逢人空說歸今朝薊城北又見塞鴻飛

思遠人

野橋春水清橋上送君行去去人應老年年草自生
出門省遠道無信向邊城楊柳別離處秋蟬今復鳴

贈同谿客

幽居得相近煙景每寥寥共伐臨谿樹同爲過水橋
自教青鶴舞分採紫芝苗更愛南峰住尋君路恐遙

望行人

秋風窓下起旅鴈向南飛日日出門望家家行客歸
無因見邊使空待寄寒衣獨倚青樓暮煙深雀鳥稀

送宮人入道

舊寵昭陽裏尋仙此最稀名初出宮籍身未稱霞衣
已別歌舞貴長隨鸞鶴飛中官省入洞空駕玉輪歸

送越客

見語孤帆去東南別會稽春雲剡溪口殘月鏡湖西
水鶴沙邊立山鼉竹裏啼謝家曾住處煙洞入應迷

贈辟穀者

學得食霞法逢人與小還身輕曾試鶴力弱未離山

無食犬猶在不耕牛自閑朝朝空漱水叩齒草堂間
思江南舊遊

江臯三月時花發石榴枝歸客應無數春山自不知
獨行愁道遠迴信畏家移楊柳東西度茫茫欲問誰
夜到漁家

漁家在江口潮水入柴扉行客欲投宿主人猶未歸
竹深村路遠一作暗月出釣船稀遙見尋沙岸春風動
草衣

送遠使

揚旌過隴頭隴水向西流塞路依山遠戍城逢笛秋

寒沙陰漫漫疲馬去悠悠爲問征行將誰封定遠侯
不食姑

幾年山裏住已作綠毛身護氣常稀語存思自見神
養龜同不食留藥任生塵要問西王母仙中第幾人
古苑杏花

廢苑杏花在行人愁到時獨開新塹底半露舊燒枝
晚色連荒轍低陰覆折碑茫茫古陵下春盡又誰知
送派人

獨向長城北黃雲暗塞天派名屬邊將舊業作公田
擁雪添軍壘收冰當井泉知君住應老須記別鄉年

宿臨江驛

楚驛南渡口夜深來客稀月明見潮上江靜覺鷗飛
旅宿今已遠此行猶未歸離家久無信又聽搗寒衣

送蠻客

借問炎州客天南幾日行江連惡谿路山遠夜郎城
柳葉瘴雲濕桂叢蠻鳥聲知君却迴日記得海花名

襄國別友

曉色荒城下相看秋草時獨遊無定計不欲道來期
別處去家遠愁中驅馬遲歸人渡煙水遙映野棠枝

送遠客

南原相送處秋水草還生同作憶鄉客如今分路行
因誰寄歸信漸遠問前程明日重陽節無人上古城

一作秋草
水邊生

上中贈日南僧

獨向雙峰老松門閉兩涯翻經上蕉葉掛衲落藤花
甃石新開井穿林自種茶時逢海南客蠻語問誰家

征西將

黃沙北風起半夜又翻營戰馬雪中宿探人冰上行
深山旗未展陰磧鼓無聲幾道征西將同收碎葉城

寄友人

憶在江南日同遊三月時採茶尋遠澗鬪鴨向春池
送客沙頭宿招僧竹裏碁如今各千里無計得相隨
送防秋將

白首征西將猶能射戟支元戎選部曲軍吏換旌旗
逐虜招降遠開邊舊壘移重收隴外地應似漢家時
律僧

苦行長不出清羸最少年持齋唯一食講律豈曾眠
避草每移徑瀘蟲還入泉從來天竺法到此幾人傳

山中秋一作春夜

寂寂山一作春景靜幽人歸去一作卧遲橫琴當月下歷

酒及花時冷一作新露濕茆屋暗泉衝竹籬西峰採藥
伴此夕恨無期

送南客

行路兩脩脩青山盡海頭天涯人去遠嶺北水空流
夜市連銅柱巢居屬象州來時舊相識誰向日南遊
宿江店

野店臨西浦門前有橘花停燈待賈客賣酒與漁家
夜靜秋江白路迴山月斜閑尋泊船處潮落見平沙
嶺外逢故人

過嶺萬餘里旅遊經此稀相逢去家遠共說幾時歸

海上見花發瘴中唯鳥飛炎州望鄉伴自識北人衣
出塞

秋塞雪初下將軍遠出師分營長記火放馬不收旗
月冷邊帷濕沙昏夜探遲征人皆白首誰見滅胡時
寄紫閣隱者

紫閣氣沉沉先生住處深有人時得見無路可相尋
夜鹿伴茅屋秋猿守栗林唯應採靈藥更不別營心
夜宿黑竈谿

夜到碧谿裏無人秋月明逢幽更移宿取伴亦探行
花下紅泉色雲西乳鶴聲明朝記歸處石上自書名

古樹

古樹枝柯少枯來復幾春露根堪繫馬空腹定藏人
蠹節莓苔老燒痕霹靂新若當江浦上行客祭為神
送徐先生歸蜀

日暮遠歸處雲間仙觀鐘唯持青玉牒獨立碧雞峰
陰澗一作洞長收乳寒泉舊養龍幾時因賣藥得向海
邊逢

隱者

先生已得道市井亦容身救病自行藥得錢多與人
問年長不定傳法又非真常見鄰家一作翁說時聞一作

時使鬼神

送友人歸山

出山成北首重去結茅廬移石脩廢井掃龕盛舊書
開田留杏樹分洞與僧居長在幽峰裏樵人見亦踈

雪谿西亭晚望

雪水碧悠悠西亭柳岸頭夕陰生遠岫斜照逐迴流
此地動歸思逢人方倦遊吳興耆舊盡空見白蘋洲

哭山中友人

入雲遙便哭山友隔今生遙墓招魂魄鐫巖記姓名
犬因無主善鶴爲見人鳴長說能尸解多應別路行

答僧拄杖

靈藤爲拄杖白淨色如銀得自高僧手將扶病客身
春遊不騎馬夜會亦呈人持此歸山去深宜戴角巾

靈都觀李道士

山觀雨來靜遠芳瓊草春素書天上字花洞古時人
泥竈煮靈液掃壇朝玉真幾迴遊閬苑青節亦隨身

送韋評事歸華陰

三峯西面住出見世人稀老大誰相識恓惶又獨歸
掃窓秋菌落開篋夜蛾飛若向一作訪雲中伴還應着
褐衣

送閩僧

幾夏京城住今朝獨遠歸脩行四分律護淨七條衣
谿寺黃橙熟沙田紫芋肥九龍潭上路同去客應稀
送海客歸舊島

海上去應遠蠻家雲島孤竹船來桂府山市賣魚鬚
入國自獻寶逢人多贈珠却歸春洞口新一作象祭
天吳

登咸陽北寺樓

高秋原上寺下馬一登臨渭水西來直秦山南去深
舊宮人不仕荒碣路難尋日暮涼風起蕭條多遠心

送新羅使

萬里爲朝使離家今幾年應知舊行路却上遠歸船
夜泊避蛟窟朝炊求島泉悠悠到鄉國還望海西天
宿廣德寺寄從舊

古寺客堂空開簾四面風移床動栖鶴停燭聚飛蟲
閑卧逐涼處遠愁生靜中林西微月色思與甯家同
宿邯鄲館寄馬磁州

孤客到空館夜寒愁卧遲雖沾主人酒不似在家時
幾宿得歡笑如今成別離明朝行更遠迴望隔山陂
舟行寄李湖州

客愁無次第川路重辛勤藻密行舟蒞灣多轉檝頻
薄遊空感惠失計自憐貧賴誦汀洲句時時慰遠人
送閑師歸江南

徧住江南寺隨緣到上京多生脩律業外學得詩名
講殿偏追入齋家別請行青楓鄉路遠幾日盡歸程
遊襄陽山寺

秋色江邊路煙霞若有期寺貧無利施僧老足慈悲
薜荔侵禪窟蝦蟆占浴池閑遊殊未徧即是下山時
登城寄王建

聞君鶴嶺住西望月依依遠客偏相憶登城獨不歸
十年爲道侶幾處共柴扉今日煙霞外人間得見稀
送從弟戴玄往蘇州

楊柳閶門路悠悠水岸斜乘舟向山寺着屐到漁家
夜月紅柑樹秋風白藕花江天詩景好迴日莫令賒
送朱慶餘及第歸越

東南歸路遠幾日到鄉中有寺山皆遍無家水不通
湖聲蓮葉雨野氣稻花風州縣知名久爭邀與客同
過賈島野居

青門坊外住行坐見南山此地去人遠知君終日閑
蛙聲籬落下草色戶庭間好是經過處唯愁暮獨還

酬韓庶子

西街幽僻處正與懶相宜尋寺獨行遠借書常送遲
家貧無易事身病是閑時寂寞誰相問祇應君自知

贈姚合少府

病來辭赤縣案上有丹經為客燒茶竈教兒掃竹亭
詩成添舊卷酒盡卧空罍闕下今遺逸誰瞻隱士星

送僧遊五臺兼謁李司空

遠去見雙節因行上五臺化樓侵曉出雪路向春開
遙寺連烽去胡兒聽法來定知巡禮後解夏始應迴

送鄭秀才歸寧

桂檝彩為衣行當令節歸夜潮迷浦遠晝雨見人稀
野艾到時熟江鷗泊處飛離琴一奏罷山雨靄餘暉

送李評事遊越

未習風塵事初為吳越遊露沾湖草晚一作日照海

山秋梅市門何在蘭亭水尚流西陵待潮處知汝不
勝愁

閑居

東城南北塵紫幘與朱輪盡說無多事能閑有幾人
唯教推甲子不信守庚申誰見衡門裏終朝自在貧

寄昭應王中丞

借得西街宅開門渭水頭長貧唯要健漸老不禁愁
獨凭藤書案空懸竹酒鈎春風石甕寺作意共君遊
酬孫洛陽

家貧相遠住齋館入時稀獨坐看書卷閑行着褐衣
早蟬庭筴老新雨徑莎肥各離爭各地無人見是非
送人任濟陰

黃綬在陰下知君非旅行將書報舊里留褐與諸生
贈別盡沽酒惜歡多出城春風濟水上候吏聽車聲
晚春過崔駙馬東園

閑園多好風不意在街東早早詩名遠長長酒性同

竹香新雨後鶯語落花中莫遣經過少年光漸覺空

夏日閑居

多病逢迎少閑居又一年藥看辰日合茶過卯時煎
草長晴來地蟲飛晚後天此時幽步遠不覺到山邊

晚秋閑居

獨坐高秋晚蕭條是遠思家貧長畏客身老轉憐兒
萬種盡閑事一生能幾時從來踈懶性應祇有僧知
和陸司業習靜寄所知

幽室獨焚香清晨下未央山開登竹閣僧到出茶堂
收拾新琴譜尋封舊藥方迢迢無別事不似在班行

酬韓祭酒雨中見寄

雨中愁不出陰黑盡連宵屋濕唯添漏泥深未放朝
無芻憐馬瘦少食信兒嬌聞道韓夫子還同此寂寥

和裴僕射移官言志

身在勤勞地常思放曠時功成歸聖主位重委群司
看壘臺邊石閑吟篋裏詩蒼生正瞻望難與故山期

酬白二十二舍人早春曲江見招

曲江水欲盡風日已恬和柳色看猶淺泉聲覺漸多
紫蒲生濕岸青鴨戲新波仙掖高情客相招共一過

酬裴僕射朝回寄韓吏部

獨愛南關裏山晴竹杪風從容朝早退蕭洒客常通
案曲新亭上移花遠寺中唯應有吏部詩酒每相同

春日李舍人宅見兩省諸公唱和因書情即事

又見帝城裏東風天氣和官閑人事少年長道情多
紫掖發章句青闈更詠謠誰知幽寂寞終日斷經過

和李僕射秋日病中作

由來病根淺易見藥功成曉日杵臼靜涼風衣服輕
猶疑多氣力漸覺有心情獨倚紅藤杖時時堦上行

早春病中

羸病及年初心情不自如多申請假牒祇送賀官書

幽徑獨行步白頭長懶梳更憐晴日色漸漸暖貧居
送嚴大夫之桂州

旌旆過湘潭幽竒得徧探莎城百越北行路九疑南
有地多生桂無時不養蠶聽謔難辨曲風俗自相諳
詠懷

老去多悲事非唯見二毛眼昏書大字耳重覺聲高
望月偏增思尋山易發勞都無作官意賴得在閑曹
使至藍谿驛寄太常王丞

獨上七盤去峰巒轉轉稠雲中迷象鼻雨裏下筆頭
水沒荒橋路鴉啼古驛樓君今在城闕肯見此中愁

留別江陵王少府

迢迢山上路病客獨行遲况此分襟日當君失意時
寒林遠路驛晚繞過荒陂別後空迴首相逢未有期
贈海東僧

別家行萬里自說過扶餘學得中州語能爲外國書
與醫收海藻持呪取龍魚更問同來伴天台幾處居
寄漢陽故人

知君漢陽住煙樹遠重重歸使雨中發寄書燈下封
同時買江鳥今日別雲松欲問新移處青蘿最北峰
送西安將

萬里海西路茫茫邊草秋計程沙塞口望伴驛峰頭
雪暗非時宿沙深獨去愁塞鄉人易老莫住近番州

題李山人幽居

襄陽南郭外茅屋一書生無事焚香坐有時尋竹行
畫苔藤杖細踏石筍鞋輕應笑風塵客區區逐世名
早春閑遊

年長身多病獨宜作冷官從來閑坐慣漸覺出門難
樹影新猶薄池光晚尚寒遙聞有花發騎馬暫行看

贈太常王建藤杖筍鞋

蠻藤剪爲杖楚筍結成鞋稱與詩人用堪隨禮寺齋

尋花入幽徑步日下寒堦以此持相贈君應愜素懷

和周贇善聞子規

秦城啼楚鳥遠思更紛紛况是街西夜偏當雨裏聞
應投最高樹似隔數重雲此處誰能聽遙知獨有君

送李騎曹靈州歸覲

翩翩出上京幾日到邊城漸覺風沙起還將弓箭行
席箕侵路暗野馬見人驚軍府知歸慶應教數騎迎

寒食夜寄姚侍御

貧官多寂寞不異野人居作酒和山藥教兒寫道書
五湖歸去遠百事病來踈况憶同懷者寒庭月上初

題清徹上人院

本寺臨壇久松間別起堂看添浴佛水自合讀經香
愛養無家客多傳得効方遇齋長不出坐卧一繩床

和裴司空即事通簡舊僚

肅肅上台坐四方皆仰風當朝奉明政早日立元功
獨對赤墀下密宣黃閣中猶聞動高韻思與舊僚同
使回留別襄陽李司空

江亭寒日晚絃筦有離聲從此一筵別獨爲千里行
遲遲戀恩德役役恨公程迴首吟新句霜雲滿楚城
和戶部令狐尚書喜裴司空見招看雪

南園新覆雪上宰曉來看誰共登春榭唯聞有地官
色連山遠靜氣與竹偏寒高韻更相應寧同謔吹歡
和裴司空以詩請刑部白侍郎雙鶴

皎皎仙家鶴遠留閑宅中徘徊幽樹月嘹唳小亭風
丞相西園好池塘夜水通欲將來放此賞望與賓同
同錦州胡郎中清明日對雨西亭宴

郡內開新火高齋雨氣清惜花邀客賞勸酒促謔聲
共醉移芳席留歡閉暮城政閑方宴語琴筑任遙情

莊陵挽謔詞 三首

白日已昭昭干戈亦漸消迎師新出道從諫早臨朝

八張集卷三
六
佞倖威權薄忠良寵錫饒丘陵今一變無復白雲謠
二

觀風欲巡洛習戰日開池始改三年政旋開七月期
陵分內外使官具吉凶儀渭北新園路蕭笳遠更悲
三

曉日龍車動秋風閶闔開行帷六宮出執紼萬方來
惻惻郊原暮遲遲挽唱哀空山煙雨夕新栢遠陵臺

和左司元郎中秋居

十首

選得閑坊住秋來對木肥風前卷筒簟雨裏脫荷衣
野客留方去山童取藥歸非因入朝省過此出門稀

二

有地唯栽竹無池亦養鵝學書求墨跡釀酒愛朝和
古鏡銘文淺神方繼語多居貧閑自樂豪客莫相過

三

閑來松菊地未省有埃塵直去多將藥朝迴不故人
見僧收酒器迎客換紗巾更恐登清要難成自在身

四

自知清靜好不要問時豪就石安琴枕穿松厭酒槽
山情因月甚詩語入秋高身外無餘事唯應筆硯勞

五

閑堂新掃洒稱是早秋天書客多呈帖琴僧與合絃
莎臺乘晚上竹院就涼眠終日無忙事還應似得仙

六

醉倚斑藤杖閑眠瘦木牀案頭行氣訣爐裏降真香
尚儉經營少居閑意思長秋茶莫夜飲新月作松檟

七

每憶舊山居新教上墨圖晚花迴地種好酒問人沽
夜後開朝簿申前發省符涓頭凡幾歲已見白髭鬚

八

菊地纔通履茶房不壘階憑醫者蜀藥寄信覓吳鞋

盡得仙家法多隨道客齋本無榮辱意不是覺安排

九

林下無拘束閑吟放性靈好時閑藥竈高處置琴亭
更選居山記唯尋相鶴經初當授衣假無吏換門鈴

十

客散高齋晚東園景象偏晴明猶有蝶涼冷漸無蟬
籐折霜來子蝸行雨後涎新詩纔上卷已得滿城傳

經王處士原居

舊宅誰相近唯僧近竹關庭閑雲滿井窓曉雪通山
來客半留宿借書多寄還明時未中歲莫便一生閑

下食仙姑山房

寂寂花枝裏草堂唯素琴因山曾改眼見客不言心
月出溪路靜鶴鳴雲樹深丹砂如可學便欲住幽林

江頭

晚步隨江遠來帆過眼頻試尋新住客少見故鄉人
回首憐歸翼長吟任此身應同南浦鴈更見嶺頭春
寄孫冲王簿公

低折滄洲簿無書整兩春馬從同事借妻怕罷官貧
道僻收閑藥詩高笑古人仍聞長吏奏表乞鎖廳頻
贈任懶

未肯求科第深坊且隱居勝遊尋野客高卧看兵書
點藥醫閑馬分泉灌遠蔬漢庭無得意誰擬薦相如
舊宮人

請舞梁州女歸時白髮生全家沒蕃地無處問鄉程
言錦不傳樣御香空記名一身難自說愁逐路人行
春日留別

遊人欲別離醉復對花枝看却春人晚莫輕少年時
臨行記分處回首是相思各向天涯去重來未有期
沒蕃故人

前年戍月支城上沒全師蕃漢斷消息死生長別離

無人收廢帳歸馬識殘旗欲祭疑君在天涯哭此時

唐張司業詩集卷二

唐張司業詩集卷三

翰林學士中書舍人張洎編緝

五言排律

和李僕射雨中寄盧嚴二給事

郊原飛雨至城闕濕雲埋
迸點時穿牖浮漚欲上埕
偏滋解籜竹併灑落花槐
晚潤生琴匣新涼滿藥齋
從容朝務退放曠掖曹垂
盡日無來客閑吟感此懷

酬李僕射晚春見寄

戟戶洞初晨鶯聲雨後頻
虛庭清氣在衆藥濕光新
魚動芳池面苔侵老竹身
教鋪甍酒處自問採花人

獨此長多病幽居欲過春今朝聽高韻勿覺離埃塵
憶盧常侍寄華山鄭隱者

獨住三峰下年深學煉丹一間松葉屋數片石花冠
酒待山中飲琴將洞裏彈開門移遠竹剪草出幽蘭
荒碧通泉架晴崖曬藥壇寄知騎省客長向白雲閑
和令狐尚書平泉東莊近居李僕射有寄

平地有清泉伊南古寺邊漲池閑遠屋出野徧澆田
舊隱離多日新鄰得幾年採幽皆一絕選勝又雙全
門靜山光別園深竹影連斜分採藥徑直過釣魚船
雞犬還應識雲霞頓覺鮮追思應不遠賞愛足難偏

此處堪長往遊人早共傳各當恩寄重歸卧恐無緣
送鄭尚書出鎮南海

遠鎮承新命王程不假催班行爭路送恩賜併時來
牙旆從城展兵符到府開蠻聲喧夜市海色浸潮臺
盡角天邊月寒關嶺上梅共知公望重多是隔年迴
徐州試反舌無聲

夏木多好鳥偏知反舌名林幽人共宿時過即分聲
竹外天空曉谿頭雨自晴居人宜寂寞深院益淒清
入霧暗相失當風閑易驚來年上林苑知爾最先鳴
省試行不由徑

田裏有微徑賢人不復行孰知求捷步又恐異端成
從易衆所欲安邪患亦生誰能達天道共此竟前程
子羽有遺跡孔門傳舊聲今逢大君子士節自光明

新城甲仗樓

謝氏起新樓西臨城角頭圖功百仗麗藏器五兵脩
結締懷薨固虛明戶檻幽魚龍卷旗幟霜雪積戈矛
暑雨焞蒸隔涼風宴位留地高形出沒山靜氣清優
睥睨斜先徹欄干宿靄浮芊芊秔稻色脉脉苑谿流
郡化王丞相詩成沈隱侯居茲良得景殊勝峴山遊

贈殷山人

鬱鬱山中客知名四十年恹惶身獨隱寂寞性應便
世業公侯籍生涯黍稷田藤懸讀書帳竹繫網魚船
已種千頭橘新開數脉泉閑遊攜酒遠出語向僧偏
入洞題松過看花選石眠避喧長汨沒逢勝即留連
自古多高跡如君少比肩耕耘此辛苦章句已流傳
昔日交遊盛當時省閣賢同袍還共弊連轡每推先
講序居重席群儒願執鞭滿堂虛左待衆目望喬遷
才異時難用情高道自全畏人顏慘澹踈物勢迤邐
賢者聞知命吾生復禮玄深藏報恩劍久降養生篇
憔悴衆夫笑經過郡守憐夕陽悲舊鶴霜氣動飢鷗

虞士誰能薦窮途世所捐伯鸞堪寄食元淑苦無錢
策蹇秋塵裏吟詩黃葉前故裘餘白領廢瑟斷朱絃
志氣終猶在逍遙任自然家貧念婚嫁身老戀雲煙
放逸栖巖鹿清虛飲露蟬鄭逃秦谷口嚴愛越溪邊
霄漢予猶阻榮枯子不牽山城一相遇感激意難宣
夏日可畏

赫赫溫風扇炎炎夏日徂火威馳迥野畏景鑠遙途
勢矯翔陽翰功分造化鑪禁城千品獨黃道一輪孤
落照頻空簟餘暉卷夕梧如何倦遊子中路獨踟躕
罔象得玄珠

赤水今何處遺珠已渺然離婁徒肆目罔象乃通玄
皎潔因成性圓明不在泉暗中看夜色塵外照晴田
無脛真難掬懷疑寶易遷今朝搜擇得應免媚晴川
和李僕射西園

遇午歸閑處西庭敞四簷高眠著瑟枕散帙檢書籤
印在休通客山晴好捲簾竹涼蠅到少藤暗蝶爭蕊
曉一作晚鵲頻驚喜踈蟬不許拈石苔生紫點欄藥吐
紅尖虛坐詩情遠幽探道侶兼所營尚勝地雖儉復
誰嫌

唐張司業詩集卷三

唐張司業詩集卷四

翰林學士中書舍人張洎編輯

七言律詩

送裴相公赴鎮太原

盛德雄名遠近知
功高先乞守藩維
街恩暫遣分龍節
署勅還同在鳳池
天子親臨樓上送
朝官齊出道邊辭
明年塞北清蕃落
應建生祠請立碑

寄元員外

外郎直罷無餘事
掃洒書堂試藥爐
門巷不教當要闢
詩篇轉覺足功夫
月明臺上唯僧到
夜靜坊中有

酒沾朝省入頻閑日少可能同伴舊遊無

贈梅處士

早聞聲價滿京城頭白江湖放曠情講易自傳新註
義題詩不着舊官名近移馬跡山前住多向牛頭寺
裏行天子如今議封禪應將束帛請先生

贈王秘書

不曾浪出謁公侯唯向花間水畔遊每着新衣看藥
竈多收古器在書樓有官祇作山人老平地能開洞
穴幽自領閑司了無事得來君處喜相留

謝裴司空寄馬

駮耳新駒駿得名司空遠自寄書生乍離華廐移蹄
澁初到貧家舉眼驚每被閑人來借問多尋古寺獨
騎行長思歲旦沙堤上得從鳴珂傍火城

酬秘書王丞見寄

相看頭白來城闕却憶漳谿舊往還今體詩中偏出
格常參官裏每同班街西借宅多鄰水馬上逢人亦
說山芸閣水曹雖最冷與君長喜得身閑

送李餘及第後歸蜀

十年人好誦詩章今日成名出舉場歸去唯將新誌
牒後來爭取舊衣裳山橋曉上蕉花暗水店晴看芋

草黃鄉里親情相見日一時攜酒賀高堂

早朝寄白舍人嚴郎中

鼓聲初動未聞雞羸馬街中踏凍泥燭暗有時衝石
柱雪深無處認沙堤常參班裏人猶少待漏房前月
欲西鳳閣星郎離去遠閣門開日入還齊

書懷寄元郎中

轉覺人間無氣味常因身外省因緣經過獨愛遊山
客計校唯求買藥錢重作學官閑盡日一離江塢病
多年吟君釣去詞中說便欲南歸傍小船

贈僧道

自到王城得幾年巴童蜀馬共隨緣兩朝侍從當時
貴五字聲名遠處傳因住紅樓通內院新承墨詔賜
齋錢閑房暫喜居相近還得陪師坐竹邊

書懷寄王秘書

白髮如今欲滿頭從來百事盡應休祗於觸目須防
病不擬將心更養愁下藥遠求新熟酒看山多上最
高樓賴君同在京城住每到花前免獨遊

題常郎中新亭

起得幽亭景復新碧莎地上更無塵琴書着盡猶嫌
少松竹栽多亦稱貧藥酒欲開期好客朝衣暫脫見

開身成名同日官連署此處經過有幾人

送揚州判官

應得煙霞出俗心
茆山道士共追尋
閑憐雛鶴偏能
畫暗辨桐聲
自作琴長嘯
每來松下坐
新詩堪向雪中吟
征南幕裏多賓客
君獨相知最校深

喜王起侍郎放牒

東風節氣近清明
車馬爭來滿禁城
二十八人初上牒
百千萬里盡傳名
誰家不借花園看
在處多將酒器行
共賀春司能鑒識
今年定合有公卿

贈王司馬

白笏朱衫年少時
久登班列會朝衣
貯財不省關身用
行義唯愁被衆知
藏得寶刀求主帶
調成駿馬乞人騎
未曾相識多聞說
遙望長如玉樹枝

史百懷

自小信成踈懶性
人間事事總無功
別從仙客求方法
時到僧家問苦空
老大登朝如夢裏
貧窮作活似村中
未能即便休官去
慚愧南山採藥翁

贈令狐博士

頭白新年六十餘
近聞生計轉空虚
久爲博士誰能識
自到長安賃舍居
騎馬出隨尋寺客
呼兒散馬乞

錢書古來賢哲皆如此應是才高與衆疎

送從弟刪東歸

雲水東南兩月程貪歸慶節馬蹄輕春橋欲醉攀花
別野路閑吟觸兩行詩價已高猶失意禮司曾賞會
成名舊山風月知應好莫過秋時不到京

贈王秘書

早在山東聲價遠曾將順策佐嫖姚賦來詩句無閑
語老去官班未在朝身屈祇聞詞客說客貧多見野
僧招獨從書閣歸時晚春水渠邊看柳條

哭丘長史

曾見先皇殿上臣丹砂久服不成真常騎馬在嘶空
攪自作書留別故人詩句徧傳天下口朝衣徧送地
中身最悲昨日同遊處看却春風樹樹新

一作東風
處處春

送枝江劉明府

老着青衫為楚宰平生志業有誰知家僮從去愁行
遠縣吏迎來恠到遲定訪玉泉幽院宿應過碧澗早
茶時向南漸漸雲山好一路唯聞唱竹枝

送從弟徹東歸

緱山領印知公奏才稱同時盡不如奉使賀成登冊
禮陪班看出奉恩書去迴在路秋塵裏受詔辭歸曉

漏初早晚得爲朝署拜閑坊買宅作隣居

哭胡十八

早得聲名年尚少尋常志氣出風塵
文場繼續成三代家族輝華在一身
幼子見生才滿月選書知寫未
呈人送君帳下衣裳白數尺墳頭柏樹新

贈賈島

籬落荒涼僮僕飢樂遊原上住多時
蹇驢放飽騎將出秋卷裝成寄與誰
拄杖傍田尋野菜封書乞米趁
時炊姓名未上登科記身屈惟應內史知

逢王建有贈

年狀皆齊初有髭鵲山漳水每追隨
使君座下朝聽易處士庭中夜會詩
新作句成相借問閑求義盡共
尋思經今三十餘年事却說還同昨日時

移居靜安坊答元八郎中

長安寺裡多時住雖守卑官不若貧
作活每常憊費力移居祇是貴容身
初開井淺偏宜樹漸覺街閑省
踏塵更喜往還相去近門前減却送書人

送楊少尹赴鳳翔

詩名往日動長安首首人家卷裏看
西學已行秦博士南宮新拜漢郎官
得錢祇了還書鋪借宅常時事

藥欄今去岐州生計薄移居偏近隴頭寒

送韓侍御歸山

聞君久卧在雲間為佐嫖姚未得還
新結茆廬招隱逸獨騎驄馬入深山
九靈洞口行應到五粒松枝醉亦攀
明日河聲出城去家僮不復掃柴關

新除水曹郎答白舍人

年過五十到南宮章句無名荷至公
黃紙開呈相府後朱衣引入謝班中
諸曹縱許為仙侶群吏多嫌是老翁
最幸紫薇郎見愛獨稱官與古人同

送楊少尹赴滿城

官為本府當身榮因得還鄉任野情
自廢田園今作主每逢耆老不呼名
舊遊寺裏僧應識新別橋邊樹已成
公事况閑詩更好將隨相逐上山行

哭元九少府

平生志業獨相知早結雲山老去期
初作學官常共宿晚登朝列暫同時
閑來各數經過地醉後齊吟唱和詩
今日春風花滿宅入門行哭見靈帷

送侯判官赴廣州從軍

年少才高求自展將身萬里赴軍門
辟書遠到開呈客公服新成着謝恩
驛舫過江分白候戍亭當嶺見

紅旛海花蠻草連冬有行處無家不滿園

答白杭州郡樓登望盡圖見寄

盡得江城登望處寄來今日到長安乍驚物色從詩
出更想工人下手難將展書堂偏覺好每來朝客盡
求看見君向此閑吟意肯恨當時作外官

贈趙將軍

當年膽略已縱橫每見妖星氣未平身貴早登龍尾
道功高自破鹿頭城尋常得對論邊事委曲承恩掌
內兵會取安西將報國凌烟閣上大書名

送和蕃公主

塞上如今無戰塵漢家公主出和親邑司猶屬宗卿
寺冊號還同虜帳人九姓旗幡先引路一生衣服盡
隨身羶城南望無迴日空見沙蓬水柳春

寒食內宴 二首

朝光瑞氣滿宮樓綵燾魚龍四面稠廊下御厨分冷
食殿前香騎逐飛毬千官盡醉猶教坐百戲皆呈未
放休共喜拜恩侵夜出金吾不敢問行由

城闕沈沈向曉寒恩當令節賜餘歡瑞煙入處開三
殿香雨微時引百官寶樹樓前分繡幙綵花廊下映
華欄空筵戲樂年年別已得三迴對御看

朝日勅賜櫻桃

仙果人間都未有今朝忽見下天門捧盤小吏初宣
勅當殿群臣共拜恩日色遙分門下坐露香才出禁
中園每年重此先偏待願得千春熟至尊

太白老人

日觀東峰幽客住竹巾藤帶亦逢迎暗脩黃籙無人
見深種胡麻共犬行洞裏仙家常獨往壺中靈藥自
為名春泉四面遠茅屋日日唯聞杵臼聲

和裴司空酬滿城楊少尹

聖朝偏重大司空人詠元和第一功擁節高臨漢水

上題詩遠入舜城中共驚向老多年別更憶登科舊
日同誰不望歸丞相府江邊楊柳又秋風

寄和州劉使君

別離已久猶為郡閑向春風倒酒餅送客將過沙口
堰看花多上水心亭曉來江氣連城白雨後山光滿
郭青到此詩情應更遠醉中高詠有誰聽

贈商州王使君

銜命南來會郡堂却思朝裏接班行才雄猶是山城
守道薄初為水部郎選勝相留開客館尋幽更引到
僧房明朝從此辭君去獨出商關路漸長

寄令狐賓客

勲名盡得國家傳，退押琴僧與酒仙。
還帶郡符經幾處，暫辭台座已三年。
留司未到龍樓下，拜表長懷玉案前。
秋日出城伊水好，領誰相逐上閑船。

寄梅處士

擾擾人間是與非，官閑自覺省心機。
六行班裏身常下，九列符中事亦稀。
市客慣曾賒賤藥，家童驚見着新衣。
君今獨得居山樂，應喜多時未辦歸。

送施肩吾東歸

知君本是烟霞客，被薦因來城闕間。
世業偏臨七里

瀨，仙遊多在四明山。
早聞詩價傳人徧，新得科名到處閑。
惆悵灞亭相送去，雲中琪樹不同攀。

崑崙兒

崑崙家住海中州，蠻客將來漢地遊。
言語解教秦吉了，波濤初過鬱林洲。
金環欲落曾穿耳，螺髻長卷不裹頭。
自愛肌膚黑如漆，行時半脫木綿裘。

贈李杭州

仙郎白首未歸朝，應爲蒼生領六條。
惠化州人盡清淨，高情野鶴共逍遙。
竹間虛館無朝訟，山畔青田長夏苗。
終日政聲長獨坐，開門唯望浙江潮。

送鄭尚書赴廣州

聖朝選將持符節，內制宣時百辟聽。海北蠻夷來舞
蹈，嶺南封管送圖經。白鵬飛達迎官舫，紅旆開當
燕客亭。此處莫言多瘴癘，天邊看取老人星。

賀秘書王丞南郊攝將軍

正初天子親郊禮，詔攝將軍領衛兵。斜帶銀刀入黃
道，先隨玉輅到青城。壇邊不在千官位，仗外唯聞再
拜聲。共喜與君逢此日，病中無計得同行。

送令狐尚書赴東都留守

朝廷重寄在關東，共說來從選上公。勲業新城大梁

鎮，恩榮更守洛陽宮。行香暫出天橋上，巡禮常過禁
殿中。每領群臣拜章慶，半開門仗日曛曛。

拜豐陵

歲朝園寢遣公卿，學省班中亦攝行。身逐陵官齊再
拜，手持木鐸叩三聲。寒更報點來山殿，曉炬分行照
栢城。却下龍門看漸遠，金峰高處日微明。

贈孔尚書

能將直道歷榮班，事著元和實錄間。三表自陳辭北
闕，一家相送入南山。買來侍女教人嫁，賜得朝衣在

篋閑宅近青山高靜處時歸林下暫開關

酬杭州白使君兼寄浙東元大夫

相印暫離臨遠鎮掖垣出守復同時一行已作三年
別兩處空傳七字詩越地江山應共見秦天風月不
相知人間聚散真難料莫歎平生信所知

寄蘇州白二十三使君

三朝出入紫微臣頭白金章未在身登第早年同座
主題詩今日異州人閭門柳色煙中遠茂苑鶯聲雨
後新此處吟詩向山寺知君忘却曲江春

送白賓客分司東都

赫赫聲名三十春高情人獨出埃塵病辭省闕歸閑
處恩許官曹作上賓詩裏難同相得伴酒邊多見自
由身老人也擬休官去便是君家池上人

贈閻少保

辭榮戀闕未還鄉脩養年多氣力强半俸歸燒伏火
藥全家解說養生方特承恩詔新門戟每見公卿不
下牀竹樹晴深寒院靜長懸石磬在虛廊

贈別王侍御赴任陝州司馬

京城在處閑人少，唯共君行並馬蹄。
更和詩篇名最出，時傾盃酒戶常齊。
同趨闕下聽鐘漏，獨向軍前聞鼓輦。
今日春明門外別，更無因得到街西。

田司空入朝

西來將相位，兼雄不與諸君覲。
禮同早變山東知，順命新收濟上立。
殊功朝官敘，謁趨門外恩使宣。
迎滿路中間，闔曉來銅漏靜，身當受冊大明宮。

送浙西周判官

由來自是煙霞客，早已聞名詩酒間。
天闕因將賀表

到家鄉，新著賜衣還。常吟卷裏相酬句，自話湖邊舊住山。
吳越主人偏愛重，多應不肯放君閑。

送吳鍊師歸王屋

王陽峰下學長生，玉洞仙中已有名。
獨戴熊鬚冠，暫出唯將鶴尾扇。同行煉成雲母休，炊爨已得雷公當。
吏兵却到瑤壇上，頭宿應聞空裏步虛聲。

送邵州林使君

詞客南行寵命新，瀟湘郡入曲江津。
山幽自足探微處，俗朴應無爭競人。
郭外相連排殿閣，市中多半用金銀。
知君不作家私計，遷日還同到日貧。

寄王六侍御

漸覺近來筋力少，難堪今日在風塵。
誰能借問功名事，祇自扶持老病身。
貴得藥資將助道，肯嫌家計不如人。
洞庭已置新居處，歸去安期與作鄰。

送稽亭山寺僧

師住稽亭高處寺，斜廊曲閣倚雲開。
山門十里松間入，泉澗三重洞裏來。
名岳尋遊今已徧，家城禮謁便應迴。
舊房到日閑吟後，林下還登說法臺。

送汀州元使君

曾成趙北歸朝計，因拜王門最好官。
為郡暫辭雙鳳

闕全家遠過九龍灘，山鄉祇有輸蕉戶。
水鎮應多養鴨欄，地僻尋常來客少。
刺桐花發共誰看。

寄孫洛陽格

久持刑憲聲名遠，好是中朝正直臣。
赤縣上來應足事，青山老去未離身。
常思從省連歸馬，乍覺同班少舊人。
遙愛南橋秋日晚，雨邊楊柳映天津。

胡山人歸王屋因有贈

轉轉無成到白頭，人間舉眼盡堪愁。
此生已是蹉跎去，每事因循鹵莽休。
雖作閑官少拘束，難逢勝景可淹留。
君歸與訪移家處，若箇峰前最較幽。

寄處州韓使君

南康太守負才豪五十如今未擁旄
早得一人知姓字常聞三事說功勞
月明渡口漳江靜雲散城頭贛石高
郡政已成秋思遠閑吟應不問官曹

送從弟濛赴饒州

京城南去鄱陽遠風月悠悠別思勞
三領郡符新寄重再登科第舊名高
去程江上多看堠迎吏船中亦帶刀
到日更行清靜化春天應不見蓬蒿

還道士

城裏無人得實年衣襟常帶臭黃煙
樓中賒酒唯留藥洞裏爭棋不賭錢
聞客語聲知貴賤持花歌詠似狂顛
尋常行處多逢見世上多疑是謫仙

寄陸渾趙明府

與君學省同官處常日相隨說道情
新作陸渾山縣長早知三禮甲科名
郭中時有仙人住城內應多藥草生
公事稀疎來客少無妨着履獨閑行

同蔣韋二少監贈李郎中

舊年同過水曹郎各罷魚符自楚鄉
重着青衫承詔命齊趨紫殿異班行
別來同說經過事老去相傳補養方
憶得當時亦連步如今獨有讀書堂

贈王侍御亦止
心同野鶴與塵遠詩似冰壺見底清
府縣同趨昨日事升沉不改故人情
上陽春晚蕭蕭雨洛水寒來夜夜聲
自歎獨爲折腰吏可憐驄馬路傍行

草土送金少卿副使歸新羅

雲島茫茫天半微向東萬里一帆飛
久爲侍子承恩重今佐使臣銜命歸
過海便應將國信到鄉猶自着朝衣
從前此去人無數光彩如君定是希

五韻送李司空赴鎮襄陽

中外兼權社稷臣千官齊出拜行塵
再調公鼎勳庸

盛三受兵符寵命新商路雪開旗旆展
楚堤梅發驛亭春襄陽風景由來好重
與江山作主人

送李僕射赴鎮鳳翔

由來勲業屬英雄兄弟連榮列位同
先入賊城擒首惡盡封官庫讓元公
旌幢獨繼家聲外竹帛新添國史中
天子欲收秦隴地故教移鎮在扶風

寄白二十二舍人

早知內詔過先輦蹭蹬江南百事疎
湓浦城中爲上佐爐峰寺後着幽居
偏依仙法多求藥長共僧遊不讀書
三省比來名望重肯容君去樂樵漁

唐張司業詩集卷四

唐張司業詩集卷五

翰林學士中書舍人張洎編輯

五言絕句

和韋開州居山十二首

宿雲亭

清淨當深處虛明向遠開
卷簾無俗客應只見雲來
梅溪

自愛新梅好行尋一徑斜
不教人掃石恐損落來花
茶嶺

紫芽連白蘂初向嶺頭生
自看家生摘尋常觸露行

流杯渠

涿酒白螺杯隨流去復回似知人把處各向面前來
盤石磴

壘石盤空遠層層勢不危不知行幾匝得到上頭時

桃塢

春塢桃花發多將野客遊日西殊未散看望酒缸頭
竹巖

獨入千竿裏緣巖踏石層筍頭齊欲出更不許人登
琵琶臺

臺上綠羅春閑登不待人每當休暇日着履戴紗巾

胡蘆沼

曲沼春流滿新蒲映野鵝閑齋朝飯後拄杖遠行多

隱月岫

月出深峰裏清涼夏亦寒每嫌西落疾不得到明看

繡衣石榻

山城無別味藥草蕪魚果時到繡衣人同來石上坐

上士泉竝

堦上一眼泉四邊青石甃唯有護淨僧添竝將盥漱

送遠客

憔悴遠歸客殷勤欲別杯九星壇下路幾日見重來

寄西峰僧

松暗水涓涓夜凉人未眠西峰月猶在遙憶草堂前

禪師

獨在西峰頂年年閉石房定中無弟子人到爲焚香

惜花

山中春已晚處處見花稀明日來應盡林間宿不歸

題暉師影堂

日早欲參禪竟無相識緣道場今獨到惆悵影堂前

涇州塞

行道涇州塞唯聞羌戍鞞道邊古雙埃猶記向安西

野田

漠漠野田草草中牛羊道古墓無子孫白楊不得老

岸花

可憐岸邊樹紅蕊發青條東風吹渡水衝着木蘭橈

唐張司業詩集卷五

唐張司業詩集卷六

翰林學士中書舍人張洎編輯

七言絕句

送蜀客

蜀客南行祭碧雞
木綿花發錦江西
山橋日晚行人少
時見猩猩樹上啼

送元結

昔日同遊漳水邊
如今重說恨綿綿
天涯相見還離別
客路秋風又幾年

宿山祠

秋草宮人斜裏墓宮人誰送葬來時千千萬萬皆如
此家在邊城亦不知

美人宮墓

紅燭臺前出翠娥海沙鋪局巧相和趁行移手巡收
盡數數看誰得最多

蠻州

瘴水蠻中入洞流人家多住竹棚頭一山海上無城
郭唯見松牌記象州

送元宗簡

貂帽垂肩窄皂裘雪深騎馬向西州暫時相見還相

送却閉閑門依舊愁

寄徐晦

鄠陂魚美酒偏濃不出琴齋見雪峰應勝昨來趨府
日簿書林上亂重重

寄白學士

自掌天書見客稀縱因休沐鎖雙扉幾迴扶病欲相
訪知向禁中歸未歸

喜王六同宿

十八年來恨別離唯同一宿詠新詩更相借問詩中
語共說如今勝舊時

題玉像堂

玉毫不着世間塵輝相分明十八身入夜無煙燈更好堂中唯有轉經人

與賈島閑遊

水北原南草色新雪消風暖不生塵城中車馬應無數能解閑行有幾人

哭丘長史

丘公已歿故人稀欲過街西更訪誰每到子城東路上憶君相逐入朝時

哭孟寂

曲江院裏題名處十九人中最少年今日春光吟不見杏花零落寺門前

患眼

三年患眼今年免校與風光便隔生昨日韓家後園裏看花猶似未分明

答劉競

劉君久被時拋擲老向城中作選人昨日街西相近住每來存問老夫身

贈華嚴院僧

一身依止荒閑院燭燿窓中有宿煙徧禮華嚴經裏

字不曾行到寺門前

逢故人

山東一十餘年別今日相逢在上都說盡向來無限
事相看盡是白髭鬚

送蕭遠弟

街北槐花傍馬垂病身相送出門遲與君別後秋風
夜作得新詩說向誰

送辛少府任安縣

才多不肯限容身老大詩章轉更新選得天台山下
住一家全作學仙人

贈任道人

長安多病無生計藥鋪醫人亂索錢欲得定知身上
事憑君為算小行年

招周居士

閉門秋雨濕墻莎俗客來稀野思多已掃書齋安藥
竈山人作意早經過

送許處士

高情自與俗人踈獨向藍谿選避居會到白雲長取
醉不能空

閑書

送律師歸婺州

京中開講已多時曾作壇頭證戒師歸到雙溪橋北
寺鄉僧爭就學威儀

題楊秘書新居

愛閑不向爭名地宅在街西最靜坊卷裏詩過一千
首白頭新受秘書郎

送睦師

九星臺下煎茶別五老峰頭覓寺居作得新詩旋相
寄人來請莫達空書

送僧往金州

聞道谿陰山水好師行一一徧經過事須覓取堪居

處若箇谿頭藥最多

尋徐道士

尋師遠道暉天觀竹院森森閉藥房聞入靜來經七
日仙童簷下獨焚香

答開州韋使君寄車前子

開州午日車前子作藥人皆道有神慙愧使君憐病
眼三千餘里寄閑人

憶故州

累石爲山作野夫自收靈藥讀仙書如今身是他州
客每見青山憶舊居

送客遊蜀

行盡青山到益州錦城樓下三江流杜家曾向此中
住爲到浣花谿水頭

送陸暢

共路長安街裏塵吳州獨作未歸身昔年舊宅今誰
住君過西塘與問人

感春

遠客悠悠任病身誰家池上又逢春明年各自東西
去此地看花是別人

贈李司議

漢庭誰問投荒客十載天南着白衣秋草茫茫惡谿
路嶺頭遙送北人歸

別客

青山歷歷水悠悠今日相逢明日秋繫馬城邊楊柳
樹爲君沽酒暫淹留

登樓寄胡家兄弟

獨上西樓盡日閑林煙演漾鳥蠻蠻謝家兄弟重城
裏不得同看雨後山

答劉明府

身病多時又客居滿城親舊盡相疎可憐絳縣劉明

府猶解頻頻寄遠書

酬藤杖

病裏出門行步遲喜君相贈古藤杖倚來自覺身生力每向傍人說得時

法雄寺東樓

汾陽舊宅今為寺猶有當時歌舞樓四十年來車馬客古槐深巷暮蟬愁

寄故人

靜曲閑房病客居蟬聲滿樹槿花疎故人祇在藍田縣強半年來未得書

鄰婦哭征夫

雙鬢初合便分離萬里征夫不得隨今日軍回身獨歿去時鞍馬別人騎

和崔駙馬聞蟬

鳳凰樓下多歡樂不覺秋風暮雨天應為昨來身暫病蟬聲得到耳傍邊

和裴僕射看櫻桃花

昨日南園新雨後櫻桃花發舊枝柯天明不待人同看遶樹重重履跡多

和長安郭明府與友人縣中會飲

一罇清酒兩人同好在街西水縣中自恨病身相去
遠此時閑坐對秋風

唐昌觀看花

新紅舊紫不相宜看覺從前兩月遲更向同來詩客
道明年到此莫過時

九華觀看花

街西無數閑遊處不似九華仙觀中花裏可憐池上
景幾重牆壁貯春風

贈姚合

丹鳳城門向曉開千官相次入朝來唯君獨走衝塵

上下馬橋邊報直廻

同常員外開元觀尋時道士

觀裏初晴竹樹涼閑行共到最高房昨來官罷無生
計欲就師求斷穀方

同韓侍御南谿夜賞

喜作閑人得出城南谿兩月逐君行忽聞新命須歸
去一夜船中語到明

西山使行望悟占寺

採玉峰連佛寺幽高高斜對驛門樓無端來去騎官
馬寸步教身不得遊

重陽日至峽道

無限青山行已盡迴看忽覺遠離家
逢高欲飲重陽酒
山菊今朝未有花

贈主客劉郎中

憶昔君登南省日老夫猶是褐衣身
誰知二十餘年後來作學曹相替人

同嚴給事聞唐昌觀玉藥近有仙過作二首

千枝花裏玉塵飛阿母宮中見亦稀
應共諸仙鬪百草獨來偷折一枝歸

九色雲中紫鳳車尋仙來到洞仙家
飛輪迴處無踪

跡唯有班班滿地花

秋思

洛陽城裏見秋風欲作歸書意萬重
復恐匆匆說不盡行人臨發又開封

憶遠

行人猶未有歸期萬里初程日暮時
唯愛門前雙柳樹
枝枝葉葉不相離

玉仙館

長谿新雨色如泥野水陰雲盡向西
楚客天難行漸遠
山山樹裏鷓鴣啼

宿府吏

野水尋花共作期今朝出郭不相隨待君公事有閑
日此地春風應過時

張蕭遠雪夜同宿

數卷新遊蜀客詩長安辟巷得相隨草堂雪夜攜琴
宿况似青城館裏時

涼州詞 三首

邊城暮雨鴈飛低蘆筍初生漸欲齊無數鈴聲遙過
磧應馱白練到安西

鳳林關裏水東流白草黃榆六十秋邊將皆承主恩

澤無人解到取涼州

古鎮城門白磧開胡兵往往傍沙堆巡邊使客行應
早欲問平安無使來

宮詞

新鷹初放兔猶肥白日君王在內稀薄暮千門臨欲
鎖紅粧飛騎向前歸

華清宮

溫泉流入漢離宮宮樹行行浴殿空武帝時人今欲
盡青山空閉御墻中

崔駙馬養鶴

身閑無事稱高情，已有人間章句名。求得鶴來翦翅，
望仙臺下亦將行。

閑遊

老身不計人間事，野寺秋晴每獨過。病眼校來猶斷
酒，却嫌行處菊花多。

劉兵曹贈酒

一斲顏色似甘泉，開向新栽小竹前。飲罷身中更無
事，移床獨就日陽眠。

送梧州王使君

楚江亭上秋風起，看發蒼梧太守船。千里同行從此

別相逢，又隔幾年。

春日早朝

曉陌春寒朝騎來，瑞雲深處見樓臺。夜來新雨沙墀
濕，東上閑門應未開。

寄朱闕二山人

為箇朝章束此身，眼看東路去無因。歷陽舊客今應
少，轉憶鄰家二老人。

寄李渤

五度谿頭躑躅紅，嵩陽寺裏講時鍾。春山處處行應
好，一月看花到幾峰。

尋仙

谿頭一徑入青崖處處仙居隔杏花更見峰西幽客
說雲中猶有兩三家

同白侍郎杏園贈劉郎中

一去瀟湘頭欲白今朝始見杏花春從來遷客應無
數重到花前有幾人

答鄱陽客藥名詩

江臯歲暮相逢地黃葉霜前半夏枝子夜吟詩向松
桂心中萬事喜君知

寄宋景

詔發官兵取亂臣將軍弓箭不離身君今獨在征東
府莫遣功名屬別人

寄王奉御

愛君紫閣峰前好心作書堂藥竈成見欲移居相近
住有田多與種黃精

題涓北寺上人

昔祭郊壇今謁陵寺中高處最來登十餘年後人多
別喜見當時轉讀僧

閑遊

終日不離塵土間若為能見此身閑今朝暫共遊僧

語更恨趨時別舊山

倡女詞

輕鬢叢梳濶掃眉爲嫌風日下樓稀畫羅金縷難相稱故着尋常淡薄衣

答元八遣紗帽

黑紗方帽君邊得稱到山前坐竹牀唯恐被人偷樣剪不曾閑戴出書堂

題僧院

聞師行講青龍跡本寺往來多少年靜掃空房唯獨坐千莖秋竹在簷前

送元八

百神齋祭相隨徧尋竹看山亦共行明日城西送君去舊遊重到獨題名

吳楚歌詞

庭前春鳥啄林聲紅夾羅襦縫未成今朝社酒停針線起向朱櫻樹下行

題方睦上人月臺觀

一身清淨無童子獨坐空堂得幾年每夜焚香通月觀可憐光得最團圓

華山廟

金天廟下西京道巫女紛紛走似煙手把紙錢迎過
客遣求恩福到神前

病中酬元宗簡

東風漸暖滿城春獨占幽居養病身莫說櫻桃花已
發今年不作看花人

寺宿齋

晚到金光門外寺寺中新竹隔簾多齋宮禁與僧相
見院院開門不得過

贈施肩吾

世間漸覺無多事雖有空名未着身合取藥成相待

喫不須先作上天人

贈王建

自君去後交遊少東野亡來篋笥貧賴有白頭王建
在眼前猶見詠詩人

逢賈島

僧房逢着款冬花出寺行吟日已斜十二街中春雪
遍馬蹄今去入誰家

楚妃怨

梧桐葉下黃金井橫架轆轤牽素縷美人初起天未
明手拂銀瓶秋水冷

金天廟下西京道巫女紛紛走似煙手把紙錢迎過
客遣求恩福到神前

病中酬元宗簡

東風漸暖滿城春獨占幽居養病身莫說櫻桃花已
發今年不作看花人

寺宿齋

晚到金光門外寺寺中新竹隔簾多齋宮禁與僧相
見院院開門不得過

贈施肩吾

世間漸覺無多事雖有空名未着身合取藥成相待

喫不須先作上天人

贈王建

自君去後交遊少東野亡來篋笥貧賴有白頭王建
在眼前猶見詠詩人

逢賈島

僧房逢着款冬花出寺行吟日已斜十二街中春雪
遍馬蹄今去入誰家

楚妃怨

梧桐葉下黃金井橫架轆轤牽素縷美人初起天未
明手拂銀瓶秋水冷

離宮怨

高堂別館連湘渚長向春光開萬戶荆王去去不復
來宮中美人自歌舞

成都曲

錦江近西烟水綠新雨山頭荔枝熟萬里橋邊多酒
家遊人愛向誰家宿

寒塘曲

寒塘沉沉柳葉疎水暗人語驚棲鳥舟中少年醉不
起持燭照水射遊魚

春別曲

長江春水綠堪染蓮葉出水大如錢江頭橘樹君自
種那不畏長繫木蘭船

臺城

臺城六代競豪華結綺臨春事最奢萬戶千門成野
草只緣一曲後庭花

春詞

新粧面面下朱樓深鎖春光一院愁行到中庭數花
朶蜻蜓飛上玉搔頭

浪淘沙詞

鸚鵡洲頭浪颭沙青樓春望日將斜
泥燕子爭歸

舍獨自狂夫不憶家

傷愚溪二首

柳門竹巷依依在野草青苔日日多縱有鄰人解吹
笛山陽舊侶更誰過

溪水悠悠春自來草堂無主燕飛回隔簾唯見中庭
草一樹山榴依舊開

聽舊宮人穆氏唱歌

曾隨織女渡天河記得雲間第一歌休唱貞元供奉
曲當時朝士已無多

楊柳枝詞二首

煬帝行宮汴水濱數株殘柳不勝春晚來風起花如
雪飛入宮牆不見人

城外春風吹酒旗行人揮袂日西時長安陌上無窮
樹唯有垂楊管別離

宿都庭有懷

雷雨湘江起卧龍武陵樵客躡仙蹤十年楚水楓林
下今夜初聞長樂鍾

無題

桃蹊柳陌好經過燈下粧成月下歌爲是襄王故宮
地至今猶有細腰多

堤上行 二首

酒旗相望大堤頭
堤下連檣堤上樓
日暮行人爭渡
急漿聲幽軋滿中流

江南江北望烟波
入夜行人相應歌
桃葉傳情竹枝
怨水流無限月明多

竹枝詞 五首

白帝城頭春草生
白鹽山下蜀江清
南人上來歌一
曲北上莫人動鄉情

日出三竿春霧銷
江頭蜀客駐蘭橈
憑寄狂夫書一
紙家住成都萬里橋

瞿唐嘈嘈十二灘
此中道路古來難
長恨人心不如
水等閒平地起波瀾

山上層層桃李花
雲間烟火是人家
銀釧金釵來負
水長刀短笠去留賒

楊柳青青江水平
聞郎江上唱歌聲
東邊日出西邊
雨道是無情還有情

楊柳送客

青楓江畔白蘋洲
楚客傷離不待秋
君見隋朝更何
事綠楊南渡水悠悠

送客還幽州

惆悵秦城送獨歸
薊門雲樹遠依依
秋來莫射南飛鴈
從遣乘春更北飛

揚州送客

南行直入鷓鴣群
萬歲橋邊一送君
聞道望鄉聽不得
梅花暗落嶺頭雲

隋宮燕

燕語如傷舊國春
宮花零落旋成塵
自從門閉春光後
幾度飛來不見人

山禽

山禽毛如白練帶
栖我庭前栗樹枝
獼猴夜來取

栗一雙中林向月飛

秋山

秋山無雲復無風
溪頭看月出深松
草堂不閉石床靜
葉間墜露聲重重

玉真觀

臺殿曾爲貴主家
春風吹盡竹窓紗
院中仙女脩香火
不許閑人入看花

蠻中

銅柱南邊毒草春
行人幾日到金麟
玉鐐穿耳誰家女
自抱琵琶迎海神

文自贈道士

茆山近別剡谿逢玉節青旄十二重
自說年年上天去羅浮最近海邊峰

重平驛作

茫茫菰草平如地渺渺長堤曲似城
日暮未知投宿處逢人更問向前程

宿天竺寺寄盧隱寺僧

夜向靈谿息此身風泉竹露淨衣塵
月明石上堪同宿那作山南山北人

唐張司業詩集卷六



